

Kommunit meeqqanut tamanut suli atualinngitsunut ulluunerani neqerooruteqarnissaminnut pisussaaitaanerisa qularnaarnissaat erseqqissarumallugu taamaaliornikkullu meeqquerivinnut utaqqisarnerup qaammatinik aalajangersimasunik sivisussusilerneqarsinnaasup qaangerneqartannginnissaat qularnaarniarlugu Meeqqanut inuusuttunullu perorsaanikkut ineriartuutaasumik ulluunerani neqeroorfigineqartarnissaat pillugu Inatsisartut peqqussutaani § 6 imm. 1-p allanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Andreas Uldum, Demokraatit)

Akissuteqaat

(Ilinniartitaanermut Ilisimatusarnermut Nunanullu Avannarlernut suleqateqarnermut Naalakkersuisoq)

Siullermeerneqarnera

Kommunit meeqqanut tamanut suli atualinngitsunut ulluunerani neqerooruteqarnissaminnut pisussaaitaanerisa qularnaarnissaat erseqqissarumallugu taamaaliornikkullu meeqquerivinnut utaqqisarnerup qaammatinik aalajangersimasunik sivisussusilerneqarsinnaasup qaangertannginnissaat qularnaarniarlugu Meeqqanut inuusuttunullu perorsaanikkut ineriartuutaasumik ulluunerani neqeroorfigineqartarnissaat pillugu Inatsisartut peqqussutaani § 6 imm. 1-p allanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuummut Naalakkersuisut qujapput.

Naalakkersuisut siullermik ilisimatitsissutigissavaat Inatsisartut oqaluuserisassatut UKA 2012/95-i meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut oqaluuserimmassuk.

Inatsisartut inatsisissaattut siunnersuummi utaqqisarnerup aalajangersimasunik sivisussusilerneqarnissaannik aalajangersagaqanngilaq. Tamatumunnga pissutaavoq Naalakkersuisut maannakkorpiaq ulluunerani neqeroorutitut aalajangersimasunik sivisussusilerneqarsinnaasup qaangerneqartannginnissaat inatsisinngorlugu piumasarisinnaanngimmassuk, tassami ulluunerani neqeroorutit tamanna naammassisinnaanngimmassuk, tassami ulluunerani neqeroorutit ataasiakkaat meeqqat suli atualinngitsut tamaasa inissaqartinngimmatigit.

Kisianni aamma taaneqassaaq, ajornartorsiut tamanna Naalakkersuisut eqqummaariffigimmassuk. Naalakkersuisut ulluunerani neqeroorutit illutaasa allanngortinneqarnissaat, allilerneqarnissaat aamma nutarterneqarnissaat eqqumaffigaat. Naalakkersuisut Ilinniartitsinermut Periusissiaanni allaqqavoq meeqqat suli atualinngitsut tamarmik perorsaanikkut neqeroorfigineqartarnissaat qulakkearniarlugu anguniarlugu Naalakkersuisut suliumasut.

Naalakkersuisut Ilinniartitsinermut Periusissiaanni sanaartugassanut aamma ukiumoortumik ingerlatsinermut aningaasartuutissat missiliukannerlugit naatsorsorneqarsimapput meeqqanut tamanut ulluunerani neqerooruteqartoqassappat. Sanaartugassat kr. 100 mio-inik aningaasaliisoqqaqinnissaa missiliorneqarpoq. Ukiumut ingerlatsinermut aningaasartuutissat

kr. 50 – 75 mio-it missaannut missiliorneqarput. Kisitsisit taakku kommunit sanaartortitsinermut aamma ingerlatsinermut aningaasaliissutaannit aasariaqassapput meeqqat suli atualinngitsut tamarmik perorsaaniikkut neqeroorfigineqartassappata qulaani tunngaviusut aallaavigalugit.

Meeqqat perorsaaniikkut ulluunerani neqeroorfigineqartannigitsut 900-t missaanniipput. Maannakkut pissutsit aallaavigalugit perorsaaniikkut sulisoq ataaseq agguaqatigiisilluni meeqqanik 3,5-inik tigummiqaarsinnaavoq. Meeqqat 900-t perorsaasunit ilinniarsimasunit isumagineqassappata perorsaanermi sulisut 250-it missaat ilinniartinneqarnissaat maannakkut sulisut saniatigut pisariaqartinneqassaaq. Tamannalu kr. 75 mio-inut missiliorneqarpoq.

Siunnersuuteqartup Naalackersuisut aamma qinnuigisimavai akissuteqaatiminni illoqarfinni ataasiakkaani utaqqisut pillugit ilisimatitseqqullugit.

Apeqquteqaatigineqartut tunngavigalugit kommunit imatut akissuteqarput:

Kommune Kujalleq nalunaarpoq meeraaqqerivinnut utaqqisoqartartoq qaammatini 3 – 6-ini, børnehavenullu utaqqisoqartartoq sivisunerpaamik qaammatini pingasuni.

Nummi meeraaqqerivinnut allatsinnermit ukiup aappaata affaatut sivisutigisumik utaqqisoqartarpoq. Meeraaqqerivinnut utaqqisunut naartuleqqaarnermiilli allatsittoqarsinnaavoq. Naartuneq meerartaarnermilu sulinngiffiup qaammatinik arfinilinnik sivisussuseqartup avataatigut qaammatit tallimat missaanni taamaalilluni utaqqisoqartarpoq.

Qeqqata Kommunia nalunaarpoq Sisimiuni meeraaqqerivinnut utaqqineq qaammatinik arfinilinnik sivisussuseqartartoq børnehavenullu maannakkut utaqqisoqanngitsoq.

Qeqertarsuarmi, Saattuni, Akunnaami, Kangaatsiami, Ikamiuni aamma Ikerasammi utaqqisoqanngilaq. Qasigiannguani meeraaqqerivinnut utaqqisoqanngilaq, børnehavenullu utaqqisut ikittoralaaarsuullutik. Uummannami meeraaqqerivinnut utaqqisoqanngilaq, børnehavenullu utaqqisoqanngingajaavilluni, tassami utaqqisuuniaraluartut erninnaq inissarsineqartarmata.

Qaanaami ulluunerani neqeroorummut utaqqisut 9-upput. Qaanaami utaqqisut sivisuumik utaqqisarput. Attumi meeraq ataaseq utaqqisuniippoq. Upernavimmi børnehavenut utaqqisut ikittuinnaapput, meeraaqqerivinnullu utaqqisut meeqqat 12-iupput, kisianni taarseraaneeq akulikitsumik pisarmat utaqqineq sivikittarluni. Aasianni meeqqat tallimat børnehavenut utaqqipput, taamaattumik utaqqineq sivisunngilaq. Kisianni meeqqat 45-t meeraaqqerivinnut utaqqisuniipput, utaqqinerlu taamaattumik sivisusarluni. Ilulissani meeraaqqerivinnut utaqqineq qaammatit pingasut missaannik sivisussuseqartarpoq, børnehavenullu utaqqineq qaammatit marluk missaannik sivisussuseqartarluni.

Taamatut naatsumik oqaaseqarlunga Naalackersuisut inassutigissavaat aalajangiiffigisassatut siunnersuut akuersissutigineqassanngitsoq. Tamatumunnga pingaartumik pissutaavoq sanaartugassanut aamma ingerlatsinermut ulluunerani perorsaaniikkut neqeroorutinut aningaasartuutissat kommunit akisussaaffigimmatigit. Kisianni Naalackersuisut, soorlu ilinniartitsinermut periusissiami takuneqarsinnaasoq, siunnersuutip anguniagai isumaqatigaat, ulluuneranilu perorsaaniikkut neqeroorutit annertusarnissaat pitsanngorsartuarnissaallu sulissutigeqqissallugit.